

Uunga siunnersuut Naalakkersuisut peqquneqassasut aasaanerani nalunaaquttap nikittarnera pillugu, Namminersornerullutik Oqartussat Nalunaarutaat nr. 19, 5. Oktober 2006-imeersup, atorunnaarsinneqarnissaannik, aalajangiiffigisassatut siunnersuut.

(Inatsisartunut ilaasortaq Per Rosing-Petersen, Attaviitsoq)

Akissuteqaat

(Naalakkersuisut Siulittaasuat)

Siullermeerinnineq

Aasaanerani nalunaaquttap aalajangersarneqarnera pillugu Namminersornerullutik Oqartussat nalunaarutaat nr. 19, 5. oktober 2006-meersoq atorunnaarsinneqassasoq, Inatsisartunut ilaasortaq Per Rosing-Petersen, siunnersuuteqarpoq.

Aasaanerani nalunaaquttap atorneqarnera pillugu Inatsisartut inatsisaat 1989-imi Inatsisartut akueraat. Siunnersuut ilaasortat najuuttut tamarmik tapersiinerisigut akuerineqarpoq.

Inatsit malillugu Kalaallit Nunaanni aasaanerani nalunaaqutaq pillugu Naalakkersuisut aalajangiisinnaapput, tamannalu inatsimmi siunertaavoq.

Kalaallit Nunaanni aasaanerani nalunaaquttap atorneqartarnerata ingerlaannarnera Inatsisartut kissaataannik pissusissamisoortumik naammassinninnertut Naalakkersuisut isigaat.

Oqaatigineqarsinnaavoq aasaanerani nalunaaqutaq Europa-mi tamangajalluinnarmi aammalu Amerikami avannarlermi, ikittuaraannaat ilaanatik, atorneqarmat. Aasaanerani nalunaaquttap atorneqannginnissaanut sanilliullugu, nunani innuttaasut, inuussutissarsiortut aamma Kalaallit Nunaanni oqartussaasut attaveqarfigisartagaanni amerlanerni aasaanerani nalunaaquttamik atuinerup malinnissaa, ataatsimoortumik isigalugu, naapertuunnerusoq Naalakkersuisut isumaqarput.

Nunanut sanilitsinnut attaveqarnerput isiginiarnagu Kalaallit Nunaanni aasaanerani nalunaaquttap atornissaa kisaatigineqarnerasoq imaluunniit kisaatigineqannginnerasoq, soorunami isummat assigiinngillat. Apeqqummi tassani Kalaallit Nunaanni aasaanerani nalunaaquttamik atuutsitsinissamut, aasaanerani nalunaaqutaq pillugu inatsimmut atuuttumut tunngaviumut, akuersaartumik tapersiineq Naalakkersuisut isumaqatigaat.

Naalakkersuisut tamanna tunngavigalugu inassutigissavaat siunnersuut itigartinneqassasoq.